

## ECLOGA VI

dixerit: 'hos tibi dant calamos (en accipe) Musae,  
 Ascraeo quos ante seni, quibus ille solebat 70  
 cantando rigidas deducere montibus ornos.  
 his tibi Grynei nemoris dicatur origo,  
 ne quis sit lucus quo se plus iactet Apollo.'

Quid loquar aut Scyllam Nisi, quam fama secuta est  
 candida succinctam latrantibus inguina monstris 75  
 Dulichias uexasse rates et gurgite in alto,  
 a! timidos nautas canibus lacerasse marinis;  
 aut ut mutatos Terei narrauerit artus,  
 quas illi Philomela dapes, quae dona pararit,  
 quo cursu deserta petiuerit et quibus ante 80  
 infelix sua tecta super uolitauerit alis?  
 omnia, quae Phoebus quondam meditante beatus  
 audiit Eurotas iussitque ediscere lauros,  
 ille canit, pulsae referunt ad sidera ualles;  
 cogere donec ouis stabulis numerumque referre 85  
 iussit et inuito processit Vesper Olympo.

## ECLOGA VII

MELIBOEVUS      CORYDON      THYRSIS

M. FORTE sub arguta consederat ilice Daphnis,  
 compulerantque greges Corydon et Thyrsis in unum,  
 Thyrsis ouis, Corydon distentas lacte capellas,  
 ambo florentes aetatibus, Arcades ambo,  
 et cantare pares et respondere parati. 5  
 huc mihi, dum teneras defendo a frigore myrtos,  
 uir gregis ipse caper deerrauerat; atque ego Daphnin  
 aspicio. ille ubi me contra uidet, 'ocius' inquit  
 'huc ades, o Meliboe; caper tibi saluus et haedi;  
 et, si quid cessare potes, requiesce sub umbra. 10  
 huc ipsi potum uenient per prata iuueni,